

आकाशवाणी

खबरां विजय बजाज कोला

1. केंद्रीय मंत्रिमंडल ने 7 ज्हार 280 करोड़ रुपें दे बजट कन्नै रेयर अर्थ परमानेंट मैग्नेट दे विनिर्माण गी बढ़ावा देने दी योजना गी मंजूरी देई दिती ऐ।
2. राष्ट्र अज्ज संविधान ध्याड़ा मना'रदा ऐ, राष्ट्रपति द्रौपदी मुर्मू होरें अज्ज संविधान दिवस दे उपलक्ष्य च नमी दिल्ली च स्थित संविधान सदन दे केंद्री कक्ष च संविधान दी प्रस्तावना पढ़ी।
3. प्रधानमंत्री नरेंद्र मोदी होरें अज्ज वीडियो कांफ्रेंस दे राहें तेलंगाना दे हैदराबाद च सफरान एयरक्राफ्ट इंजन सर्विसस इंडिया दी इकाई दा उद्घाटन कीता, उनें आखेआ जे भारत अपने निवेशकें गी विकसित भारत दे सह-निर्माताएं दे रूपै च दिखदा ऐ।
4. राष्ट्री जांच एजेंसी - एनआईए ने दिल्ली लालकिला आतंकवादी धमाके दे मामले च फरीदाबाद दे बसनीक इक व्यक्ति गी गिरफ्तार कीता।
5. भारत ते संयुक्त अरब अमीरात ने वाणिज्य दूतावास, वीज़ा ते कनूनी खेतर च सैहयोग बधाने आस्तै होर गैहीं पुट्टने पर सहमति जताई ऐ।
6. लोकसभा अध्यक्ष ओम बिड़ला होरें संघ लोक सेवा आयोग दे शताब्दी ब'रे आहले समारोह गी संबोधित करदे होई आखेआ ऐ जे आयोग ने देशें दे प्रशासनिक ढांचे गी मज़बूत कीता ऐ।

<><><><><><>

Cabinet Decisions (HL1)

केंद्रीय मंत्रिमंडल ने 7 ज्हार 280 करोड़ रुपें दे बजट कन्नै सिंटेड रेयर अर्थ परमानेंट मैग्नेट दे विनिर्माण गी बढ़ावा देने दी योजना गी मंजूरी देई दिती ऐ। अपनी चाल्ली दी इस पैहली गैह दा मकसद देशें च हर ब'रे 6 ज्हार मीट्रिक टन इंटीग्रेटेड रेयर अर्थ परमानेंट मैग्नेट दा विनिर्माण शुरू करना ऐ। सूचना ते प्रसारण मंत्री अश्विनी वैष्णव होरें नमी दिल्ली च संवाददाताएं गी दस्सेआ जे रेयर अर्थ परमानेंट मैग्नेट सबनें शा मजबूत किस्म दे परमानेंट मैग्नेट चा इक्क न ते इलेक्ट्रिक गड्डिएं, अक्षय ऊर्जा, इलेक्ट्रॉनिक्स, एयरोस्पेस ते डिफेंस एप्लीकेशन लेई बड़े ज़रूरी न। उनें गलाया जे एह योजना संगठित विनिर्माण सुविधा बनाने च मदाद करग। इलेक्ट्रिक गड्डिएं, अक्षय ऊर्जा, औद्योगिक कम्में ते उपभोक्ता इलेक्ट्रॉनिक्स दी तेज़ी कन्नै बधदी मंग गी दिक्खदे होई, देशें च रेयर अर्थ परमानेंट मैग्नेट दी खपत 2 ज्हार 30 तगर दूनी होने दी मेद ऐ। ऐल्लै, देशें च रेयर अर्थ परमानेंट मैग्नेट दी मंग मुख रूप कन्नै आयात राहें पूरी होंदी ऐ। इस पैहल दे कन्नै, देश अपनी पैहली इंटीग्रेटेड रेयर अर्थ

परमानेंट मैग्नेट मैन्युफैक्चरिंग इकाई बनाग। एहदेनै रोजगार पैदा होग, आत्मनिर्भरता मज़बूत होग ते 2070 तगर नेट जीरो हासल करने दी देसै दी वचनबद्धता गी बी मजबूती थोग।

<><><><><><>

Prez. Preamble Reading

राष्ट्रपति द्रौपदी मुर्मू होरें अज्ज संविधान दिवस दे उपलक्ष्य च नमी दिल्ली च स्थित संविधान सदन दे केंद्री कक्ष च संविधान दी प्रस्तावना पढ़ी। इस मौके पर राष्ट्रपति होरें आखेआ जे संविधान राष्ट्री पंछान दी बुनियादी ऐ ते एह राष्ट्र गी अगगे बधाने, औपनिवेशिक मानसिकता दी थाहै पर राष्ट्रवादी नजरिया स्थापित करने दा मार्गदर्शक ढांचा ऐ। उ'नें आखेआ जे संविधान लोकें दिऐं आसैं-मेदें गी अभिव्यक्त करने लेई बड़ा असरदार ढांचा प्रदान करदा ऐ। तोआई, उपराष्ट्रपति सी.पी राधाकृष्णन होरें आखेआ जे संविधान सुतेंतरता संग्राम च शामिल लक्खां बद्दे देशवासिऐं दे सामूहिक ज्ञान, बलिदान ते सुखने दा प्रतीक ऐ। उ'नें आखेआ जे महान विद्वानें, प्रारूप समिति ते संविधान सभा दे सदस्यें करोड़ें भारतवासिऐं दी आसैं-तांगें गी पूरा करने लेई गैह्ने बचार पेश कीते। इस मौके पर राष्ट्रपति होरें मलयालम, मराठी, नेपाली, पंजाबी, बोडो, कश्मीरी, तेलुगु, उड़िया ते असमिया सने 9वें भाशाएं च संविधान दा अनुवादित संस्करण जारी कीता।

<><><><><><>

PM-Letter

प्रधानमंत्री नरेंद्र मोदी होरें संविधान दिवस दे मौके पर देशवासिऐं दे नांस चिट्ठी लिखियै 1949 च संविधान गी ऐतिहासिक रूप कन्नै अपनाए जाने गी चेता कीता ऐ। राष्ट्र दी तरक्की च संविधान दी स्थाई भूमिका दा जिक्र करदे होई प्रधानमंत्री होरें अपनी चिट्ठी च लिखेआ ऐ जे 2015 च सरकारै इस पवित्तर दस्तावेज दे सम्मान च 26 नवंबर गी संविधान दिवस दे रूप च घोशत कीता हा। प्रधानमंत्री होरें नगरिकें गी आग्रैह कीता ऐ जे ओह अपनी जिम्मेदारिएं गी सभनें शा उप्पर रखन ते वोट पाने दे अधिकार दा इस्तेमाल करियै लोकतंत्र गी मजबूत बनान। संसद ते संविधान दे प्रति सम्मान प्रगट करदे होई श्री मोदी होरें इस गल्लै पर लोस पाई ऐ जे किस चाल्ली संविधान नै कमजोर लोकें गी बी सर्वोच्च स्तर पर राष्ट्र दी सेवा करने लेई सशक्त बनाया ऐ। प्रधानमंत्री होरें संविधान सभा दे सदस्यें गी श्रद्धांजलि अर्पित कीती ते डॉ. राजेंद्र प्रसाद, डॉ. भीम राव अम्बेडकर ते केई प्रतिष्ठित महिला सदस्यें गी चेता कीता जिंदी दूरदर्शिता नै संविधान गी समृद्ध बनाया। श्री मोदी होरें इस गल्लै पर जोर दिता जे इस ब'रे दा संविधान दिवस खासतौर पर महत्वपूर्ण ऐ कीजे एह सरदार वल्लभ भाई पटेल ते भगवान

बिरसा मुंडा हुं'दी 150मीं जयंती, वंदे मातरम दी 150मीं ब'रेगंड ते श्री गुरु तेग बहादुर जी हुं'दी शहादत दे 350 ब'रे दे मौके पर आया ऐ।

<><><><><><>

PM Safron Aircraft

प्रधानमंत्री नरेंद्र मोदी होरें अज्ज वीडियो कांफ्रेंस दे राहें तेलंगाना दे हैदराबाद च सफरान एयरक्राफ्ट इंजन सर्विसस इंडिया दी इकाई दा उद्घाटन कीता। इस मौके पर प्रधानमंत्री होरें आखेआ जे भारत दुनिया च तेजी कन्नै बधा'रदे घरेलू हवाबाजी बजारें चा इक ऐ। उनें आखेआ जे भारत रास-पूजी ते नमिएं काहडें दा सुआगत करदा ऐ। उनें आखेआ जे भारत दा मन्नना ऐ जे जेड़े मुख्य रास-पूजी लांदे न, ओह छड़े निवेशक नेईं सगुआं सैह निर्माता न। उनें आखेआ जे उं'दी सरकार इ'नें निवेशकें गी विकसित भारत दे तैहत हितधारक दे रूप च दिखदी ऐ।

<><><><><><>

LG-Const. Day

उपराज्यपाल मनोज सिन्हा होरें अज्ज जम्मू च “संविधान दिवस” दे सिलसिले च आयोजित कार्यक्रम च भारती संविधान दे पितामाह ते रचेयता खोआने आहलें गी श्रद्धांजलि भेंट कीती। इस मौके उनें आखेआ जे पिछले 76एं ब'रें थमां स्थाड़ा संविधान हर कुसै लेई समाजी बरोबरी, सुतंत्रता ते समाजी न्यास दी बत दस्सने आहली रोशनी दे रूपे च स्थाड़ा मार्गदर्शन करदा आवा'रदा ऐ। किट्ठे गी संबोधत करदे होई एल.जी होरें आखेआ जे 1949 च भारत नै अपना संविधान स्वीकार कीता हा। उनें सभनें लोकें गी आखेआ जे हर भारती गी इस गल्लै दा ध्यान रखना लोड़चदा जे उं'दा हर कम्म, कारवाई ते हरकत संविधान दे दायरे अंदर गै होनी लोड़चदी। अज्ज संविधान दिवस दे मौके पर समूलचे जम्मू प्रांतै च केई चाल्ली दे आयोजन कीते गए जिंदे च लोकें संविधान दी पालमा दी सगंध चुक्की। एहदी प्रस्तावना गी किट्ठे रलिए इक सगंध दे रूपे च पढ़ेआ ते “रन फॉर युनिटी” द्रौड़ च बी हिस्सा लैता।

<><><><><><>

NIA Arrest (HL4)

राष्ट्री जांच एजेंसी - एनआईए ने अज्ज दिल्ली लालकिला आतंकवादी धमाके दे मामले च फरीदाबाद दे बसनीक इक व्यक्ति गी गिरफ्तार कीता। इस पर धमाके दे मुख अरोपी उमर उन नबी गी धमाके शा पैहले शरण देने दा आरोप ऐ। एनआईए ने इक बयान च दस्सेआ ऐ

जे आरोपी दी पन्छान हरियाणा दे फरीदाबाद दे बसनीक शोएब दे रूपै च होई ऐ। इस मामले च गिरफ्तार होने आहला एह 7मां मुख आरोपी ऐ। एनआईए दे मताबक जांच थमां पता लग्गा ऐ जे शोएब ने 10 नवंबर गी राश्ट्री राजधानी च लाल किले दे बाहर होए दे कार बम्ब धमाके शा पैहले आतंकवादी उमर उन नबी गी साज-समेयान मतल्लक मदाद उपलब्ध करोआई ही। इस धमाके च केई लोक मारे गे हे ते केई होर जख्मी होए हे। धमाके दे पिछे दी पूरी आतंकी साजिश दा पता लाने दे जतनें दे तैहत गिरफ्तार लोकें कोला पुछगिछ जारी ऐ। एजेंसी ने आखेआ ऐ जे ओह केई राज्यें दे पुलस बलें कन्ने मिलिये कम्म करा'रदी ऐ ते इस भीषण हमले च शामिल गिरोह दे होरनें सदस्यें दी पन्छान करने, उंदा पता लाने ते उंनेंगी गिरफ्तार करने लेई तपाशी अभियान चला करदी ऐ।

<><><><><><>

26/11

महाराष्ट्र दे मुखमंत्री देवेन्द्र फडनवीस ते उपमुखमंत्री अजीत पवार होरें 2008 च होए दे मुम्बई आतंकवादी हमले दुरान शहीद होए दे पुलस अफसरें ते जवानें दी 17मीं बरसी दे मौके पर मुम्बई पुलस दे कमिशनर दफतरें च स्थित पुलस शहीदी स्मारक पर श्रद्धांजलि अर्पित कीती। गृह मंत्री अमित शाह होरें बी मुम्बई हमले च जान मुहाने आहले सभनें लोकें गी श्रद्धांजलि अर्पित कीती। सोशल मीडिया दी इक पोस्ट च श्री शाह होरें आखेआ ऐ जे आतंकवाद छड़इ इक मुख्य आस्तै गै नेई सगुआं पूरी मनुखता आस्तै इक श्राप ऐ। रक्षा मंत्री राजनाथ सिंह होरें आखेआ ऐ जे साढ़े रक्षा बलें दा बलिदान हर चाल्ती दे आतंकवाद खलाफ देसै दी लड़ाई गी लगातार मजबूतरी देआ करदा ऐ।

<><><><><><>

LG- 26/11

जम्मू-कश्मीर दे उपराज्यपाल मनोज सिन्हा होरें 26/11 दे मुम्बई आतंकी हमले च शहीद होए दे सभनें लोकें गी अज्ज श्रद्धांजलि भेंट कीती ऐ। सोशल मीडिया पर इक पोस्ट च उपराज्यपाल होरें आखेआ जे मुख्य म्हेशां उनें बहादुर सुरक्षाकर्मियें दा आभारी रौहग- जिनें देसै दी संप्रभुता ते अखंडता लेई बहादुरी कन्ने लड़ाई लड़ी ते सर्वोच्च बलिदान दिता। सिन्हा होरें उन्दी दलेरी ते निस्वार्थ भावना गी चेता करदे होई इस गल्लै पर जोर दिता जे उन्दी विरासत पीढ़ियें गी प्रेरित करदी रौहग ते आतंकवाद खलाफ मुख्य दे संकल्प गी होर मजबूत करोग।

<><><><><><>

56वें भारती अंतर्राष्ट्री फिल्म महोत्सव च ईरान ते इराक दे फिल्म निर्माताएं अज्ज संवाददाता सम्मेलन च दो फिल्में दी जानकारी दिंदे होई दस्सेआ जे संसरशिप आम लोकें दे दैनिक जीवन गी कियां प्रभावित करदी ऐ। ईरान दी फिल्म माई डॉटर्स हेयर- राहा दे निदेशक सईद हेसम फरहमंद जू नै आखेआ जे एह फिल्म उन्दे अपने अनुभवं पर आधारत ऐ ते ईरानी महिलाएं दे संघर्ष गी दर्शादी ऐ। निर्माता सईद खानिनामाघी होरें आखेआ जे प्रतिबंधें ईरान दे मध्यम वर्ग गी कमजोर करी दिता ऐ। एह फिल्म सर्वश्रेष्ठ नवोदित फीचर फिल्म श्रेणी आस्तै प्रतिस्पर्धा च ऐ। इराक दी फिल्म द प्रेसिडेंट्स केक दे संपादक एलेक्जेंड्रो-राडू होरें 1990 दे दशक च तानाशाही दे दरान जीवन गी चित्रित करने आस्तै गैर-पेशेवर अभिनेताएं दे इस्तेमाल दा उल्लेख कीता। इक तानाशाह पर आधारित एह फिल्म युवा लामिया पर बनी दी ऐ। एह प्रतिबंधें दे अन्तर्गत इराक दी पीड़ा दा इक प्रतीकात्मक पात्र ऐ।

<><><><><><>

India UAE (HL5)

भारत ते संयुक्त अरब अमीरात ने वाणिज्य दूतावास, वीज़ा ते कनूनी खेतर च सैहयोग बधाने आस्तै होर गैहीं पुट्टने पर सहमति जताई ऐ। अज्ज अबू धाबी च आयोजित भारत-संयुक्त अरब अमीरात संयुक्त वाणिज्य दूतावास मामले दी समिति दी 6मीं बैठक च दौनें पक्खें इक-दुए दे मुल्खें च रौहने आहले बसनीकें दी सुरक्षा, सम्मान ते कल्याण जकीनी बनाने आस्तै अपनी वचनबद्धता सुनिश्चित करने के लिए अपनी प्रतिबद्धता परतियै पक्की कीती ऐ। भारती प्रतिनिधिमंडल दी अगुवाई बदेश मंत्रालय दे सचिव अरुण कुमार चटर्जी होरें कीती। बदेश मंत्रालय ने आखेआ ऐ जे दौनें पक्खें प्रधानमंत्री नरेंद्र मोदी ते संयुक्त अरब अमीरात दे राष्ट्रपति शेख मोहम्मद बिन जायद अल नाहयान हुंदे नजरिये थमां प्रेरित सरबंधें दी मजबूती पर बल दिता। भारत ने संयुक्त अरब अमीरात च बड़ी बद्ध गिनतरी च रौहने आहले भारती समुदास दे कल्याण लेई संयुक्त अरब अमीरात दे नेतृत्व ते अधिकारियें दे समर्थन दी सराहना कीती। एह दपक्खी सरबंधें गी मजबूत करने च महत्वपूर्ण ऐ।

<><><><><><>

Speaker UPSC (HL6)

लोकसभा अध्यक्ष ओम बिड़ला होरें आखेआ ऐ जे संघ लोक सेवा आयोग ने देशै दे प्रशासनिक ढांचे गी मजबूत कीता ऐ। नमीं दिल्ली च आयोग दे शताब्दी बरें आहले समारोह गी संबोधित करदे होई श्री बिड़ला होरें आखेआ जे इस संस्था दी पारदर्शिता, जवाबदेही, निरपक्खता ते गोपनीयता ने आयोग गी दुनिया भर च इक पारदर्शी संस्था दे रूपै च मान्यता दिती ऐ।

डिजिटल जुग, आर्टिफिशियल इंटेलिजेंस, जलवायु परिवर्तन ते राष्ट्री सुरक्षा पर आयोग दी भूमिका दी सराहना करदे होई लोकसभा अध्यक्ष होरें आखेआ जे आयोग ने सुशासन ते उत्कृष्टता दे नमें प्रतिमान स्थापित कीते न। श्री बिड़ला होरें आखेआ जे एह संस्था भविक्ख दिएं पीढ़ियें गी तैयार करदी रौहग जेहड़ी राष्ट्र-निर्माता दे रूपै च कम्म करग ते भारत गी इक विकसित ते आलमी सतह उप्पर इक अगुआ मुख्य बनने दी दिशा च मार्गदर्शन दिंदी रौहग। अमले, सार्वजनिक शकैतें ते पेंशनें आहले मैहकमे दे राज्य मंत्री डॉ. जितेंद्र सिंह होरें आखेआ जे संघ लोक सेवा आयोग स्वतंत्रता दे दिन थमां गै आजाद भारत दी जातरा दा गवाह रेहा ऐ। उनें आयोग दे अध्यक्ष अजय कुमार होरेंगी प्रतिभा सेतु पोर्टल दी स्थापना लेई बधाई दिती।

<><><><><><>

RS Oath NC

जम्मू-कश्मीर थमां नमें चनोए दे त्रै सांसद औंदी पैहली दिसंबर गी राज्यसभा च ओहदे ते राजदारी दी सगंध चुक्कडन। उसै रोज संसद दा स्याले आहला इजलास बी शुरू होआ करदा ऐ। इनें त्रउं सांसदें च शम्मी आंबराय, सज्जाद अहमद किचलू ते चौधरी मोहम्मद रमजान शामिल न, जिनेंगी उपराष्ट्रपति ते राज्यसभा दे चेयरमैन सी.पी राधाकृष्णन सगंध चुकाडन। राज्यसभा दे इनें चुनाएं च त्रै सीटां नेशनल कांफ्रेंस नै जितियां हियां जिसलै जे बीजेपी गी छड़ी इक्कै सीट पर जित हासल होई ही। बीजेपी दे सांसद सत शर्मा होर पैहले गै एह सगंध चुक्की चुके दे न।

<><><><><><>

JK –Govt. Awards

जम्मू-कश्मीर सरकारें 2026 दे स्टेट अवार्ड- जेहड़े गणतंत्र दिवस दे मौके पर दिते जाने न- लेई नामजदगियां मंगियां न। आम प्रशासनिक विभाग आसेया इस बरे जारी इक अधिसूचना मुजब एह अवार्ड बहादुरी- साहित्य- कला- कारीगरी- समाज -सुधार- सार्वजनिक सेवा- लाइफ टाईम एचीवमेंट- खेड्ड- मीडिया- पर्यावरण- उद्योगिक उद्यमता दे क्षेत्र च दिते जाने न। इंदे लेई नामजदगियां समाजी ते खेड्ड संगठन- गैर-सरकारी संगठन- युनिवर्सिटियां- प्रशासनिक सचिव ते जम्मू-कश्मीर कला संस्कृति ते भाषा अकादमी आसेया भेजियां जाई सकदियां न। एहदे लेई खीरी तरीक 15 दिसम्बर 2025 रखी गेदी ऐ।

<><><><><><>

Test Cricket

दक्षिण अफ्रीका नै गुवाहाटी दे दुए ते अखीरी टेस्ट क्रिकेट मैच च भारत गी 408 रन कन्नै हराइयै श्रृंखला 2-0 कन्नै अपनी नांs कीती। 549 रन दे लक्ष्य दा पिच्छा करदे होई भारत दी टीम खेड्ढ दे अखीरी ध्याड़े 140 रन पर गै आउट होई गई। भारत आस्तै रविन्द्र जडेजा नै 54 रन बनाए। दक्खण अफ्रीका दे साइमन हार्मर नै 6 विकेट लैते। दक्खन अफ्रीका नै टेस्ट मैच च भारत गी इन्नै बड्डे फर्क कन्नै हराइयै नमां रिकार्ड बनाया। एहदे अलावा दक्खन अफ्रीका नै भारत च दुई बारी ते 25एं बरें च पेहली बार टेस्ट श्रृंखला जिती ऐ। एहदे थमां पैहले साल 2000 च हैंसी क्रोने हुंदे नेतृत्व च दक्खण अफ्रीका नै श्रृंखला पर जित हासल कीती ही।

<><><><><><><>